

INUIT ATAQATIGIIT

INATSISARTUNI



20. august 2015

UKA 2015/39

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Ilinniagaqartut nunatsinneersut Danmark-imi najugaqartut nunatsinni Folketing-imut qinigassanngortittunik qinersisinnaanerat aqutissiuuniarlugu Folketing-imut qinersinermut inatsisaasup allanngortinnissaa pillugu saaffiginninnissaannik Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inuit Ataqtigii Inatsisartuni ilaasortaataat)

Tungavilersuut:

Ilinniagaqartut nunatsinneersut Danmark-imi najugaqartut nunatsinni Inatsisartunut kommunitullu qinersisoqartillugu allakkatigut qinersisinnaapput. Tassuunatigut kalaallit ilinniagaqartut ukiuni aalajangersimasuni nunatsinnik qimatsillutik ilinniagaqariartorsimasut nunatsinni tamat oqartussaanerannut toqqaannartumik akuusinnaapput, nunattalu siunissaata ilusilersorneqarnissaanut peqataasinnaallutik. Innuttaasutut nunagisami qinersinerni peqataasinnaaneq qinigassanngortissinnaanerlu tamat oqartussaanerannut pingaartuuvoq.

Folketing-imulli qinersisoqarnerni ilinniagaqartut nunatsinneersut Danmark-imi najugaqartut nunatsinni qinersisinnaatitaanngillat. Tassani patsisaavoq Danmark-imi najugaqarnerminni kommunimi najugaqarfigisaminni qinersisartut allattorsimaffianni ilaasaramik. Qinersinernilu marloriarluni qinersisoqarsinnaanngimmat nunatsinni Folketing-imut qinigassanngortitanik qinersisinnaatitaanngillat.

Ilinniagaqartut nunatsinneersut Danmark-imi najugaqartut Folketing-imi ilaasortat nunatsinneersut danskit Inatsisartuini sinnisorisatut isiginiarnerusaraat uagut Inuit Ataqtigiinni maluginiartarsimavarput. Taamaammallu killormoortutut isigisariaqarsorinarpoq ilinniagaqartut Folketing-imut qinigassanngortittunik nunatsinneersunik qinersisinnaannginnerat.

Folketing-imi sulineq annertuumik nunatta Danmark-illu akornanni attaveqatigiinnermik ilusilersuisuuvoq, Folketing-imilu sulinerlut - Inuit Ataqtigii tungaannit - akuusut ilagaat ilinniagaqartut nunatsinneersut Danmark-imiinnerini pitsaasunik atugarnissaasa qulakkeerniarnissaat. Tamanna ilinniagaqartut nunatsinneersut kattuffiat - Avalak - suleqatigineratigut ataatsimeersuartitsisarnikkut, taamatullu inuussutissarsiortunut kiisalu nunat tamalaat aallartitaannut naalackersuinermillu suliaqartunut attaveqarsinnaanerit aqutissiuullugit.

Taamatut attaveqateqarnikkut suleqateqarnikkullu ilinniagaqartut nunatsinneersut periarfisinneqarsinnaasimapput. Sungiusarfissatut ilinniagaqartutullu ikiuulluni suliffissaqarnerit periarfissiuunneqarsimapput.

Taamaammallu Folketing-imi ilaasortat nunatsinneersut akuttunngitsumik qaqutiguunngitsutigut ilinniaqartunut Danmark-imiittunut akunniliullutik ikiuteqataasarput.

Tamakku tungavigalugit Naalackersuisut Naalagaaffeqatigiiffiup iluani oqartussanut saaffiginninnissaat pissusissamisoortutut Inuit Ataqtigiinni isumaqarfigaarput. Tassuunatigut siunertaassaaq ilinniagaqartut nunatsinneersut Danmark-imi najugaqartut Folketing-imut nunatsinni qinigassanngortittunik qinersisinnaalernissaat aqutissiuunneqarsinnaammat.

Naalakkersuisut Inatsisartullu siunnersuutigisarpuk inussiarnersumik oqaluusereqataaffigisagaat neriuutigarpuk.

Pisortanut aningaasatigut allaffissornikkullu kingunerisassat

Massuma siunnersuutigineqartup akuerineqarneratigut Namminersorlutik Oqartussani allaffissornikkut aningaasartuutaasinnaasut AC najoqqutaralugu inuup ataatsip ukiumut suliarisinnaasaasa naatsorsornerat naapertorlugu kr. 500.000,-inik akeqarsinnaasoq naatsorsuutigineqarsinnaavoq, tamannalu paasisassarsiorniarluni suliasartai assigisaalu Namminersorlutik Oqartussat iluini ingerlanneqassappata pisariaqarsinnaalluni. Naalagaaffimmi pisortanut saaffiginninnermut aningaasartuutissat allaffeqarfiup iluani aningaasassaqtinnerup iluani nanertuutaangitsumik salliutinneqarsinnaaneri ilimagineqarpoq.

Naalagaaffimmi pisortanut saaffiginninneq ilinniagaqartunut nunatsinneersunut iluaqutaasumik inerineqassappat nunatsinni qinersisinnaasut allattorsimaffiini ilanngunneqarnissanut saaffiginnissutit kommunit suliarisariaqarsinnaassavaat.

Namminersorluni inuussutissarsiuteqarnermut aningaasatigut allaffissornikkullu kingunerisassat

Siunnersuutigineqartup akuerineqarneratigut namminersorluni inuussutissarsiuteqartunut kinguneqarnissaa ilimagineqanngilaq.

Innuttaasunut aningaasatigut allaffissornikkullu kingunerisassat:

Siunnersuutigineqartoq akuerineqassappat Naalagaaffimmilu pisortanut saaffiginninneq ilinniagaqartut nunatsinneersut Danmark-imi najugaqartut nunatsinni Folketing-imut qinigassartortittunik qinersisinnaalernissaminnut periarfissinneqarpata ilinniagaqartut nammineerlutik nunatsinni kommuniminni qinersisinnaasut allattorsimaffiannut ilanngunneqarnissartik siunertaralugu nalunaaruteqarsinnaanerat pisinnaavoq.